

## Headlines

- 1 प्रधानमंत्री नरेंद्र मोदी होरें ओडिशा दे भुवनेश्वर च 18में प्रवासी भारती दिवस सम्मेलन दा उद्घाटन कीता। उनें आखेआ जे विदेशें च रवा करदे भारतीय दुनिया च राष्ट्र दे राजदूत दे तौर पर कम्म करा करदे ना।
- 2 लेफ्टिनेंट गवर्नर मनोज सिन्हा होरें केंद्र शासित प्रदेश जम्मू-कश्मीर च त्रै नमें अपराधिक कनूनें गी लागू करने दा जायजा लैता ऐ।
- 3 जम्मू च जम्मू-कश्मीर विधानसभा दे सेंट्रल हाल च विधायकें दे सिखलाई प्रोग्राम दी शुरूआत होई गई ऐ।
- 4 गृह मंत्रालय नै राज्यें ते केंद्र शासित प्रदेशें गी अपील कीती ऐ जे ओह जेलें च टी.बी दी बमारी गी खत्म करने आहले 100 रोजा अभियान दा सरिस्ता करन।
- 5 मौसम सरबन्धी मैहकमे नै 16 जरवरी तोड़ी मौसम खुश्क रौहने दी पेशनगोई कीती ऐ। जम्मू-श्रीनगर जरनैली शिड़क गड़ियें दी आओजाई लेई दौनें बक्ख दा खुल्ली ऐ। मुगल रोड पर बर्फ किट्टी होने करियै लगातार 12-में ध्याड़े गड़ियें दी आओजाई बंद ऐ।

<><><><><><>

## PM PBD

प्रधानमंत्री नरेन्द्र मोदी होरें आखेआ ऐ जे 2047 तगर भारत गी विकसित राष्ट्र बनाने च प्रवासी भारतीयें दी भूमिका अत्त लाज़मी ऐ। मोदी होर ओडिशा दे भुवनेश्वर च 18में प्रवासी भारती दिवस दा औपचारिक उद्घाटन करने परैन्त सभा गी संबोधित करै करदे हे। प्रधानमंत्री होरें वैश्विक विकास ते भारत दी विकास जात्तरा च प्रवासी भारतीयें दी महत्वपूर्ण भूमिका दी सराहना कीती। उनें दुनिया भरै च देशै दे राजदूतें दे तौर पर भारती प्रवासियें दिएं सेवाएं गी उजागर कीता। इस मौके पर, प्रधानमंत्री मोदी होरें प्रवासी तीर्थ दर्शन योजना दे तैह्त्त प्रवासी भारतीयें लेई इक खास सैलानी रेलगड्डी, प्रवासी भारतीय एक्सप्रेस दी उद्घाटन जात्तरा गी बी झंडी दस्सी। कार्यक्रम दरान श्री मोदी होरें केई प्रदर्शिएं दा उद्घाटन कीता जिंदे च केन्द्र ते राज्यें दी सतह उप्पर बक्ख-बक्ख मंत्रालयें पास्सेआ लाए गेदे स्टॉल बी शामिल हे। इस कार्यक्रम च

विदेश मंत्री डॉ. एस. जयशंकर, केंद्रीय मंत्री धर्मेन्द्र प्रधान ते अश्विनी वैष्णव, ओडिशा दे गवर्नर हरि बाबू कंभमपति, मुख्मन्त्री मोहन चरण माझी तें होर बी केई बड्डी हस्तियां शामिल होइयां।

<><><><><><>

### LG-Review Meet

लेफ्टिनेंट गवर्नर मनोज सिन्हा होरें जम्मू-कश्मीर च त्रै नमें अपराधिक कनूनें-भारतीय न्याऽ संहिता-2023, भारतीय नागरिकसुरक्षा संहिता-2023 ते भारती साक्ष्य अधिनियम-2023 दी अमल आवरी दा जायजा लैने आस्तै अज्ज इक उच्चि सतह दी बैठक लाई। एल.जी होरें पैहली जुलाई 2024 थमां लागू होए दे इनें त्रौनें कनूनें दी असरदार ढंगै सिर अमल आवरी लेई पुलस कर्मिणें ते होरनें सरबन्धत मैहकमें दे मलाजमें दी सिखलाई ते समर्थ निर्माण लेई कीते गेदे हीलें दी जानकारी लैती। सिन्हा होरें अपराधिक न्याऽ प्रणाली गी तगड़ा बनाने ते खासतौरा पर बडे संगीन अपराधें, राष्ट्र विरोधी गतिविधिणें ते आतंकवाद कन्नै जुडे दे मामलें च दोष-सिद्ध करने दी दर बधाने लेई समर्पित जत्तें दे महत्वै पर जोर पाया। एल.जी होरें आखेआ जे पुलस आसेआ कीती गेदी कार्रवाईणें च पारदर्शिता यकीनी बनाने दे कन्नो-कन्नी जांच लेई तय समें-सीमा पर खरा उतरना बी यकीनी बनाया जाना लोड़चदा ऐ। मुख्म सचिव अटल डुल्लू, डी.जी.पी. नलिन प्रभात, गृह विभाग दे प्रधान सचिव चंद्राकर भारती ते होर दुए बड्डे ऐहलकार बी इस मौके पर उत्थे मजूद हे।

<><><><><><>

### Orientation Camp

जम्मू-कश्मीर विधानसभा च नमें चुने गेदे विधायकें लेई जम्मू विधानसभा परिसर दे केंद्री कक्ष च अज्जै थमां त्र'ऊं दिनें दा सिखलाई कार्यक्रम रम्भ होआ। अज्ज लोआए गेदे उद्घाटनी कार्यक्रमै च मुख्मन्त्री उमर अब्दुल्ला, विधानसभा दे स्पीकर अब्दुल रहीम राथर, उपमुख्मन्त्री सुरिंद्र चौधरी ते विधानसभा च बरोधी धडें दे नेता सुनील शर्मा हुंदे सने वरिष्ठ अधिकारिणें बी शिरकत कीती। आकाशवाणी दे जम्मू संवाददाता दी रिपोर्ट मूजब, इस सिखलाई कार्यक्रम दा सरिस्ता जम्मू-कश्मीर विधानसभा सचिवालय आसेआ लोकसभा सचिवालय दे सैहयोग कन्नै कीता जा'रदा ऐ। एहदा मकसद नमें चनोए दे विधायकें गी संसदी प्रथाणें, मतल्लक जानकारीयां देना तां जे ओहू लोकें दिणें आसें-मेदें गी पूरा करने दी अपनी जिम्मेदारी गी खरी चाल्ली तोढ़ चाढी सकन।

## Jammu-Srinagar Vande Bharat

रेल मंत्रालय नै आखेआ ऐ जे कटड़ा ते श्रीनगर बश्कार तौले गै जम्मू-श्रीनगर वंदे भारत एक्सप्रेस रेल गड्डी चलाई जाग। इस रेल गड्डी दे 8 डब्बे होडन ते एहू 3 घंटे 10एं मिनटें च अपना सफर तैय करोग। स्टाडे संवाददाता नै खबर दिती ऐ जे जम्मू-श्रीनगर वंदे भारत रेल गड्डी दा डजैन खास एंटी फ्रीजिंग तकनीक कन्नै तैयार कीता गेदा ऐ। मंत्रालय नै एहू बी जानकारी दिती ऐ जे जम्मू रेलवे स्टेशन 8 प्लेटफार्में ते अज्जै-कल्लै दी स्थूलतें कन्नै नमें सिरेआ तैयार कीता जाग।

<><><><><><>

## Self Defence

समाज कल्याण विभाग आसेआ युवा सेवाएं ते खेड्डें सरबंधी मैहकमे दे सैह्योग कन्नै बेटी बचाओ बेटी पढ़ाओ अभियान दे तैह्तर रियासी दे इन्डोर खेड्डू स्टेडियम च कुड़िएं लेई 5एं दिनें दे आत्म-रक्षा सरबंधी सिखलाई कार्यक्रम दा सरिस्ता कीता जा'रदा ऐ। आकाशवाणी दे जम्मू संवाददाता दी रिपोर्ट मूजब, जिले दे बक्ख-बक्ख सरकारी स्कूलें दिआं तकरीबन 50 कुड़ियां एह्दे च हिस्सा लै करदिआं ना। एह्दा मकसद कुड़िएं गी आत्म-रक्षा दे गुर सखाइयै सशक्त बनाना ऐ। जिला समाज कल्याण अधिकारी सचिन शर्मा होरें इ'नें कुड़िएं कन्नै मलाटी कीती ते उनें'गी आखेआ जे ओहू खरी चाल्ली आत्म-रक्षा दे गुर सिक्खन। कुड़िएं गी एहू सिखलाई इस खेत्तर दे माहिरें आसेआ दिती जा करदी ऐ। सचिन शर्मा होरें आखेआ ऐ जे इस चाल्ली दे कार्यक्रम कुड़िएं अंदर आत्मविश्वास पैदा करदे ना। उनें आखेआ जे कुड़िएं गी सशक्त बनाइयै गै समाज दी तरक्की कीती जाई सकदी ऐ। उनें आखेआ जे इस कार्यक्रम दे राहें कुड़िएं गी छडे आत्मरक्षा दे गुर गै नेई सखाए जा'रदे सगुआं उंदे अंदर अपने उप्पर विश्वास करने दी भावना बी पैदा कीती जा'रदी ऐ।

<><><><><><>

## MHA-TB

गृह मंत्रालय नै सब्बनें राज्यें ते केंद्र शासित प्रदेशें गी गुजारिश कीती ऐ जे ओहू जेलें ते सुधार संस्थानें च टी.बी दी बमारी गी खत्म करने लेई 100 रोजा अभियान चला। एहू अभियान मुल्खै चा इक बमारी गी खत्म करने लेई केंद्र सरकार दे धेइयै दा हिस्सा ऐ। मंत्रालय नै इक्क चिट्ठी च आखेआ जे राज्य ते केंद्र शासित प्रदेश सब्बनें जेलें च टी.बी दी जांच दे कैप लाने ते कन्नै जानकारी ते संचार मतल्लक सामग्री लान। मंत्रालय नै जेलें ते सुधार संस्थानें च टी.बी दी बमारी बारै जागरूकता गतिविधियां चलाने लेई बी आखेआ।

<><><><><><>

## Javed Rana Tribal Hostel

जल शक्ति, जंगलात, पर्यावरण ते जनजातीय मामले सरबन्धी मंत्री जावेद अहमद राणा होरें सिविल सचिवालय जम्मू च इक मीटिंग दी अध्यक्षता कीती। इस दौरान उनें जम्मू-कश्मीर च जनजातीय होस्टलें दे कम्मकाज दा जायजा लैता। मंत्री होरें होस्टलें च अमले, साफ-सफाई च सुधार करने, डिजिटल कलासरूम, लाइब्रेरियें ते होरनें स्थूलतें पर जोर दित्ता। मंत्री होरें आखेआ जे सरकार नै जाजातीय समुदाय दे लोकें दे जीवन गी उबड़ा चुक्कने लेई बक्ख-बक्ख योजनाएं दी शुरूआत कीती ऐ।

<><><><><><>

## DC Rajouri Inspection

रजौरी दे डिप्टी कमिशनर अभिषेक शर्मा होरें अज्ज ग्रामीण विकास विभाग रजौरी दे दफ्तरै दा चानचक्क दौरा लाया ते दफ्तर दे रिकार्ड आहले दस्तावेजें दा निरीक्षण कीता। डिप्टी कमिशनर होरें उत्थे कम्म करने आहले अमले दी पाबंदी ते होर दुए अंदरूनी मामलें दा बी संज्ञान लैता। इस मौके पर उनें सरबन्धत अधिकारिएं गी निर्देश जारी कीते जे ओहू लोकें गी बेह्तरनी ढंग्गै कन्नै सेवाएं दी दस्तयाबी जकीनी बनान।

<><><><><><>

## TB Elimentary

जम्मू दे डिप्टी कमिशनर सचिन कुमार वैश्य, राज्य च टी.बी दी बमारी सरबन्धी अधिकारी डॉक्टर ज्योति जोली होरें इक मीटिंग दौरान टी.बी दी बमारी गी खत्म करने मुतल्लक अभियान दी प्रगति दा जायजा लैता। 100 दिन तोड़ी चलने आहले इस अभियान दी शुरूआत सत्त दिसंबर गी होई ही। इस पैहलकदमी दा मकसद टी. बी दे मामले दा पता लाने च तेजी आह्नना ईलाज च चिर लग्गने च कमी करना ते इलाज सरिस्ते च सुधार करना ऐ। एहू अभियान 33एं राज्यें ते केंद्र शासित प्रदेशें दे समूलचे 347एं जिलें च चला करदा ऐ। डॉक्टर जोली होरें टी.बी दे मामलें दा पता लाने ते टी.बी दा ईलाज करने लेई निक्खे शिविर ते कीती जा करदी जांच दा बी जिक्र कीता। डिप्टी कमिशनर होरें अभियान दी सहायता लेई अपनी बचनबद्धता जाहिर कीती ते नशाने गी हासल करने लेई जिले दी सरगर्म भागीदारी दी जरूरत पर जोर पाया। इस मीटिंग च सी.एम.ओ डॉक्टर हरबक्श सिंह, डी.टी.ओ डॉ. अनु सलोय, विश्व स्वास्थ्य संगठन दे सलाहकार डॉ. शैलेंद्र तोमर ते होर अधिकारी बी शामिल हे।

<><><><><><>

## State Taxes Deptt.

जम्मू-कश्मीर दे टैक्स करें सरबन्धी मैहकमे नै आई.टी.सी च बेमेल दे मामलें, B2C दे बिलें गी परतियै दौहराने दी कवैतू कन्नै निब्बड़ने ते जीएसटी सरबन्धी होर खलाफवर्जियें कन्नै निब्बड़ने लेई चलाए जा करदे अभियान गी तेज करी दित्ता ऐ। मैहकमे नै जम्मू संभाग दे बक्ख-बक्ख जिलें च जांच करने ते नियमें-कनूनें गी लागू कराने सरबन्धी अभियान चलाए न। राज्य दे टैक्स सरबन्धी अधिकारियें दा आखना ऐ जे ए.आई दे बक्ख-बक्ख सरिस्ते सवां थहोई दी जानकारी दे आधार पर मैहकमे नै राज्य दे टैक्स अधिकारियें दी अगुवाई च इक खास टीम दा गठन कीता। इस टीम नै बक्ख-बक्ख 7एं थाहरें पर बक्ख-बक्ख कारोबारी इदारे दी जांच पड़ताल कीती। जम्मू-कश्मीर दे कमिशनर स्टेट टैक्स पी.के भट्ट ते नियम-कायदे लागू कराने ते प्रशासन सरबन्धी अतिरिक्त कमिशनर नमरिता डोगरा हुंदी दिक्ख-रिक्ख च एहू निरीक्षण कीता गेआ।

<><><><><><>

## Weather/Highway

मौसम विभाग नै औंदी 16 जनवरी तगर जम्मू कश्मीर च मौसम आम तौरा पर खुशक रौहने ते आमतौर उप्पर बद्दल घनोए दे रौहने दी मेद दस्सी ऐ। आकाशवाणी दे जम्मू संवाददाता नै जानकारी दिती ऐ जे 8 कोला 10 जनवरी तगर मौसम भलेयां खुशक रौहग, कल 10 जनवरी दी रातीं ते अत्तरूं 11 जनवरी गी मौसम बदलोखड़ा बनोग ते जम्मू दे झिगड़े इलाके च हौली बरखा बरी सकदी ऐ जिसलै के कश्मीर घाटी ते जम्मू प्रांतै दे उप्परले प्हाड़ी इलाकें च टांमी-टांमी थाहें पर हल्की जनेई बर्फबारी बी होई सकदी ऐ। ओहदे बाद 12 कोला 14 जनवरी तगर मौसम खुशक रौहने दी तवक्को ऐ जिसलै 15 ते 16 जनवरी गी आम तौरा पर गासै पर बद्दल घनोए दे रौहगन ते किश टांमी-टांमी थाहूर्ं पर हल्की बर्फबारी बी होई सकदी ऐ। मौसम विभाग नै आखेआ ऐ जे ठंडू दा प्रकोप बरोबर जारी रौहग ते सैलानिएं ते आम यात्रिएं गी यात्रा करने कोला पैहले प्रशासन ते ट्रैफिक दिएं हिदायतें गी दिक्खी सुनी लैन। तोआई स्हाड़े संवाददाता दी रिपोर्ट मूजब, जम्मू-श्रीनगर राश्ट्री जरनैली सिड़कै पर दौने बक्खी दा गड्डिएं दी आओजाई बवस्थित ढंगै कन्नै चलै करदी ऐ। उआं जम्मू खित्ते दे रजौरी ते पुंछ जिलें गी कश्मीर घाटी कन्नै जोड़ने आहली ऐतिहासिक मुगल रोड अज्ज उप्परोतली 12में रोज बी गड्डिएं दी आओजाई लेइ बंद ऐ।

<><><><><><>